

EDITORIAL

Atuhan an Task Force Philippines han imperyalista nga US

Kinahanglan bug-os-kusog nga suknaon ngan atuhan an ginbug-os nga Task Force Philippines han imperyalista nga US nga gagamiton hini ha dugang nga militar nga panginginlabot ha nasud. Ha pagbubug-os han Task Force Philippines, mas butaray nga ginkokontrol han US an Armed Forces of the Philippines (AFP) ngan iba pa nga panseguridad nga pwersa han neokolonyal nga estado para magserbe ha heyopolitikal nga interes han US ha Asia.

An Task Force Philippines usa nga bag-o nga yunit han militar han US nga nakabase ha Pilipinas. Katuyuanan hini nga igtalaan an direksyon, plano ngan mga operasyon han AFP ha "pan-gawas nga dependensa" tikang ha South China Sea tubtub ha Luzon Strait, kontra ha kunuhay "mapwersa ngan agresibo" nga gios han China ha kadagatan.

Dako nga buwa an deklarado nga katuyuanan hini nga "pahugton an burubligay han US ngan Pilipinas." Pataraw-an nga ginamin mismo han hepe han AFP nga waray hiya aram nga detalye hiunong hini nga plano nga *task force* han US. An aram la niya nakasubay ini ha konsepto ngan operasyon han Task Force Ayungin nga itingtukod han US hadton nakalabay nga tuig.

Igintukod an nahiuna nga *task force* hadton 2024 ngan ginbug-os han mga upisyal militar han US. Ini an nagplano han mga operasyon nga "resupply" han AFP ha barko hini nga BRP Sierra Madre nga nakaduong ha Ayungin Shoal. Iginpadara han US an iya higamit militar ngan armas, ngan ginsuportahan ha iya sarbeylans ha kahanginan ngan



kalarakan (*satellite*). Ha laktud, an mga "resupply mission" han AFP mga pankadagatan nga operasyon nga direkta nga mando ngan kontrol han US.

An pagbubug-os han Task Force Philippines an pinakaurhi nga pagatentar han imperyalismo nga US ngan pangilal-an han mas hitaas nga balitang han panginginlabot ha nasud. Nagseserbe ini ha balayan han Indo-Pacific Strategy han US ha larang nga ensirkulohan an imperyalista nga karibal hini nga China, ngan pugngan an dugang nga pagdako han poder hini ha militar ngan ekonomiya.

Pira katuig na nga gin-gagamit ngan ginsusunghan han US an pan-

kadagatan nga sumpakiay han Pilipinas ngan China, agud tagan rason an paggamit ha Mutual Defense Treaty ngan iba pa nga mga diri pantay nga panmilitar nga kasarabutan agud pakusgon an presensya han mga panmilitar nga pwersa ha Pilipinas. Igintindog hini an diri mamenos ha siyam nga base militar han US nga ginkikilala ilarum han Enhanced Defense Cooperation Agreement (EDCA).

Mas damo pa an diri gin-aamin nga base ngan pasilidad han US ha magkalain-lain nga parte han nasud, kalakip an igintindog nga pasilidad han AFP ha Mavulis Island ha Batanes para magamit han US. Mayda liwat presensya an militar

han US ha mga pasilidad ha Ilocos Norte, ha Aurora, Quezon, Mindoro, Panay ngan makalain-lain nga parte han Palawan.

Gintatawuhan ini han mga upisyal ngan sundalo nga Amerika-no, o gin-iistakan han mga armas sugad han Typhon *missile system* ngan iba pa nga mapandestroso nga armas. Plano liwat han US nga itindog ha nasud an mga pabrika han bala, *drone* ngan iba pa nga armas. Dugang pa hini an plano han US nga magtindog han *refuelling depot* ha hiluag nga kadagatan han Davao Gulf.

Pirmihan gihap an presensya ha kadagatan nga luglop han Pilipinas han mga bokis de gerra han US, ka-lakip an mga higante nga *aircraft carrier* nga sakay an yukut-yukot nga sundalo nga Amerikano. Libre ini nga naglalayag ngan naduong ha diin man nga parte han Pilipinas. Gin-gagamit ini ha susrunod ngan sagunson nga iginlalansar nga pag-papahiara ha gerra ha Pilipinas, ngatanan nakapokus ha senaryo han pagbuto han gerra ha China.

Lunod-patay nga niyutiyo hi Marcos ha iya imperialista nga amo nga US. Dugang pa hiya nga nainalagad tungod ha desperasyon nga kuhaon an suporta han US. Atubangan ini han nakaladkad nga pam-pulitika nga krisis dara han nabuk-

sas nga dagko nga kaso han korap-syon ngan nagpapadayon nga hilua-gan nga kagiusan protesta kontra ha iya rehimen.

Ha miting hadin naglabay han ASEAN, hi Marcos an nagserbe nga tagdara han adyenda han US, ngan iginduso an sering niya nga "en-hanced defense cooperation" han mga nasud ha Southeast Asia kontra ha "hulga ngan agresyon" han China. Nasupalpal hi Marcos ngan waray bisan usa nga sinuporta ha iya iginproponer.

Subay ha mando han US, susru-nod nga ginsulod ni Marcos an mga kasarabutan nga "visiting forces" ha Japan ngan Canada, mga nasud nga may panmilitar nga alyansa ha US. Tuyo hini nga tugutan nga ga-miton hini nga mga nasud an teri-toryo nga pandagat ngan katunaan han Pilipinas para ha mga tig-ob-ha-US nga mga operasyon militar. Ha yana, iginrarakudako ni Marcos nga mapalit hiya han mga higamit pan-gerra ha US agud kunuhay ma-kaato hin usa kabulan antes umaro hin bulig ha iba nga nasud.

Kaduyog han adyenda ni Mar-cos, nagios an magkalain-lain nga maka-US nga partido, organi-sasyon, mga institusyon, ngan parte han masmidya agud suportahan an natikadako nga presensya militar han US ha Pilipinas, ha tahub han

pagdependa ha "West Philippine Sea." Ngatanan ini ginpopondohan han imperyalismo nga US ngan naagi ha mga institusyon sugad han National Endowment for Democracy ngan naawas ha grupo sugad han "INCITEgov." Hadton 2023, nag-a-lutaga liwat an gubyrno han US han \$1.6 kabilyon para ha 5-katuig nga programa para ha "propaganda nga kontra-China."

Ginpapaypayan nira an Sino-phobia o an kangalas ha ngatanan nga may kalabutan ha China. Sugad kan Marcos, ginpapagawas nira nga may hulga han "pananakop" ngan "agresyon" han China, samtang mamingaw kun tiunan-o nagpapa-bilin nga neokolonya han imperya-lismo nga US an Pilipinas. Ginpapa-gawas nira nga "maka-China" an hin-o man nga natipa ha mga mili-tar nga panginginlabot han US ha Pilipinas.

Napostura yana an mga Duterte nga kontra-US agud tahuban an karukayaknon han korapsyon nga dabi an ira pamilya. Buaw ini nga pamostura. Han nakada ha poder, waray ginhimo hi Rodrigo Duterte agud ipaserra an mga EDCA *site* ngan hul-os nga igbasura an VFA ngan mga panmilitar nga kasarabu-tan ha US. Ginbuhian niya an sun-dalo nga Amerikano nga nagpatay kan Jennifer Laude. Mamingaw ya-na an mga Duterte ha plano han US nga itindog an *refuelling depot* ha Davao Gulf.

Atubangan han natikakusog nga duso han US para manulsol han gerra ngan danason o gamiton an Pilipinas ha pakiggerra kontra ha China, mahugot an panginahanglan nga magkaurusa an katawhan agud gumios para ulangon ngan atuhan ini.

Kinahanglan pakusgon an guliat han katawhan para bungkagon an ngatanan nga base militar han US, tanggalon an tanan nga mga misayl han US ha mga sikreto nga lokasyon ha Pilipinas, ngan palayason an na-nginginlabot nga mga panmilitar nga pwersa han US ha nasud. Kina-hanglan isumpay ini nga guliat ha pakigbisog han katawhan para ma-kaalinggawas ha mga kuko han im-peryalista nga buwitre, kab-uton an soberaniya ngan tukuron an nasud nga talwas ngan mauswag. AB

 Bolyum LVI Ihap 21 Nobyembre 7, 2025	
Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	
Gin-uunod Editorial: Atuhan an Task Force Philippines han imperyalista nga US1 Pagpapakaniyutiyo han rehimen Marcos ha US3 Higante nga protesta kontra kurakot ha Nob. 304 Panlasurbo han bagyo ngan anomaliya ha Cebu5 Mga protesta5 Pakigbisog han trabahador5 94th IB, gin-atake han BHB5 Ginpapakusog han Kaguma an iya ranggo6 Ha dagmit nga pulong7 Natikagrabe nga panmuyopoy han rehimen Trump8 Natikagrabe nga kamutangan han mga Pilipino nga migrante9 North Caloocan, iginpailarum ha militarisasyon9 Panginginlabot han NTF-Elcac ha mga unibersidad10 Isla han Leyte, ginlasurbo han militarisasyon10 Pagtalapas ha katungod ha Panay ngan Negros10	
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

Niyutiyo nga rehimen Marcos Jr: Tag-undong han imperyalista nga adyenda han US ha SEA

Hadton Oktubre 31, igin-anunsyo ni Pete Hegseth, sekretaryo han Department of War han US (hadto anay Department of Defense) an pagtukod han US han "Task Force Philippines" ha miting han ASEAN Defense Ministers' Meeting (ADMM)-Plus ha Malaysia. Bubug-uson ini nga *task force* han 60 nga elemento tikang ha US Pacific Fleet ngan pamumunuan han usa nga Amerikano nga heneral. Pagpapahiluag ini ha mga operasyon han US Task Force Ayungin nga nakabase ha Palawan ngan ha presente nagdidiriher ha pakikiggitay han Pilipinas ha mga barko nga Chinese ha gin-aawayan nga mga isla ngan bahura.

Iginsapubliko ni Hegseth an Task Force Philippines kahuman diri abuyunan han ASEAN an ginproponer niya nga pagbug-os han usa nga "shared maritime domain awareness program" agud isentro ha US an mga datos-paniktik kontra ha China. Waray umabuyon an mga nasud ha proposisyon ha luyo han tanyag niya han abante nga teknolohiya nga *drone* sugad han *unmanned* nga sarakyan nga pankahanginan ngan pankadagatan kabalyo han kooperasyon.

Usa na la nga "Indo-Pacific Chief of Defense Cooperation Council" an ginbug-os ni Hegseth, kaupod an sunud-sunuran nga niyutiyo hini nga hi Gilbert Teodoro, ngan mga sekretaryo ha depensa han Australia ngan Japan ha pag-erestorya nira ha Malaysia hadton Nobyembre 1. Waray bag-o hini nga konseho tungod kay an upat nga nasud mayda na luun-luon nga "kooperasyon" ha porma han mga *bilateral*, *trilateral* ngan *multilateral* nga panmilitar nga kasarabutan.

Tagbandera han imperyalista nga adyenda

Antes an anunsyos, nagpahayag han kabaraka an mga kaamyaw nga nasud han Pilipinas ha pahayag ni Ferdinand Marcos Jr ha ASEAN hadton Oktubre 28 diin nanawagan hiya para ha "enhanced defense cooperation" kaupod an Japan ngan US kontra ha "seryoso nga hulga ngan agresyon han China ha rehiyon."

Pahimatngon han *prime minister* han Malaysia nga hi Anwar Ibrahim, "ayaw pagpadara ha mga eksternal nga pwersa" para solbaron an

internal nga mga sumpakiay. Sering ni Ibrahim, kaangayan nga pareho likyan an panmirit ngan kasamukan ha ngaran han istabilidad han rehiyon. Gin-aghat niya an mga nasud nga ig-agi ha dayalogo, kooperasyon ngan murayaw nga pamaagi an pag-resolba han mga karukayaknon subay ha mga prinsipyo han ASEAN. Nagpahayag han kabaraka an Indonesia, Laos ngan Cambodia ha dugang pa nga pagpaso han tensyon ha kadagatan dara han agresibo nga pangangayat ni Marcos ha China.

Diri pala maiha, iginparayaw pa han kumander han AFP nga hi Romeo Brawner an kapas han Typhon Missile System nga "abuton an China." Nakabutang an nasering nga sistema han misayl ha norte nga parte han Luzon, hirani ha Taiwan. Makokonsidera ini nga opensiba nga pagpostura ngan parte han panginlabot han US ha internal nga karukayaknon han Taiwan ngan China.



Base han imperyalista nga makinarya ha gerra

An Pilipinas, pinaagi han lunod-patay nga niyutiyo nga estado hini, an nag-uusahan nga nasud ha Southeast Asia nga natugot ha panmaihaan nga pagbabase han mga langyaw nga tropa ngan ira mga armas ha katunaan ngan kadagatan hini. Ini la liwat an mayda pormal nga mga panmilitar nga kasarabutan ha US nga kapareho han Mutual Defense Treaty ngan Enhanced Defense Cooperation Agreement ha rehiyon. Tigaman han lunod-patay hini nga pagpapakaniyutiyo, ginbug-os han AFP an Strategic Command agud ig-urusa an magkain-lain nga sanga hini para mas pasayunon an daloy han kumand han US ha sakob hini.

Ha masunod nga mga bulan, diri na la an mga tropa nga Amerikano an tutugutan han rehimen Marcos nga magbase ha Pilipinas. Aada na ha negosasyon an pagtitindog han Japan ngan Australia, mga mayor nga alyado han US, han kalugaringon hini nga mga base ngan imbak han nasud. Dugang ha US, upat nga nasud an gintutugutan nga gumawas-sulod han tropa, gamit ngan sarakyan subay ha ginbug-os nga mga *visiting forces agreement* (VFA). Pinakaurhi hini an VFA kaupod an Canada nga ginpirman han hadton Nobyembre 2 pala.

Waray hunong ngan nagsasarusaliwan an presensya han mga langyaw nga tropa ha nasud ha porma han waray kahumanan nga *war games*, *multilateral maritime exercise*, "pagsasarua" han ekspersensya ngan mga sibil-militar nga operasyon. Gin-gagamit hini bisan an susrunod nga mga kalamidad nga nahiaaguman han mga Pilipino, sugad han linog ngan baha, agud himuon nga "normal" ha katawhan an ira presensya ngan panginlabot ha internal nga mga karukayaknon ha nasud.

AB

Higante nga protesta han katawhan kontra kurakot, igin-aandam para ha Nobyembre 30

Nakatalaan nga ilansar an usa nga higante nga protesta han katawhan kontra korapsyon ha Luneta Park ha Manila ngan iba pa nga parte han nasud ha Nobyembre 30. Pangungunahan an paggios han bag-o nga tukod nga Kilusang Bayan Kontra Kurakot (KBKK) nga iginbunga han protesta han 100,000 nga indibidwal ha gintawag nga Baha ha Luneta hadton Septyembre 21. Ipapanawagan han grupo: "Lahat ng sangkot, dapat managot!"

Sigon ha KBKK, ha pagpapabaton gud la ha ngatanan nga dabi ha anomaliya mahuhuman an sistematisiko nga korapsyon nga nagpepeste ha katawhan. Kaupod ha "tanang" hi President Marcos nga amo an nagbug-os ngan nag-apruba ha tinuig nga badyet nga putos han anomaliya ngan hi Vice President Duterte nga ginkasuhan ha pagmalgastar han gatos kamilyon nga *confidential and intelligence funds*.

Ha bug-os nga Nobyembre, sinemana nga iglalansar han mga kaapi han KBKK an Black Friday Protest, mga piket ngan kalampagan ha mga komunidad, unibersidad, pabrika, merkado ngan kun diin nagtitirok an katawhan. Pangungunahan liwat hini an mga porum, dagko nga miting ngan pagsab-ong han mga istrimer agud abuton an mas damo nga Pilipino.

Hadton Oktubre, susrunod an nagin protesta ngan mga aktibidad han mga organisasyon ilarum han KBKK. Nagmartsa tikang Liwasang Bonifacio ngadto ha Mendiola ha Manila an yukut-yukot nga parag-uma, kaupod an iba pa nga demokratiko nga sektor hadton Oktubre 21. Panawagan nira an tinuod nga reporma ha tuna ngan pagpapabaton ha rehimen Marcos ha korapsyon. Nagkamayda liwat han mga paggios ha Cebu, Bacolod, Davao ngan Santiago City ha Isabela, ngan mga prubinsya han Southern Tagalog ngan Panay. Nasuporta ha mga parag-uma ngan naglansar hin "global kalampagan" an mga migrante nga Pilipino tikang ha US, Canada, Australia, United Kingdom, Japan, Hongkong ngan South Korea.

Hadton Oktubre 24 iginlansar an Black Friday Protest han Bayan-NCR ha mga syudad han Manila, Quezon, Pasig, Taguig, ngan Va-

lenzuela. Mayda kapareho nga aktibidad ha Laguna ngan Albay. Ginprotestahan naman han mga membro han Kalikasan-PNE, Peoples Surge ngan Kadamay an *compound* ha Taguig City diin nag-uupisina an ICI.

Hadton Oktubre 27, nagtirok ha San Juan City an mga obispo, padi ngan pastor tikang ha magkalain-lain nga denominasyon nga nakabase ha National Capital Region agud tukuron an Church People Against Corruption. Kinabuwasan, nagprotesta an mga tsapter han Gabriela ha Nasyunal nga Adlaw han Protesta han Kababayan-an.

Hadton Oktubre 30, nagprotesta an mga trabahador pankalibugan ha Quezon City agud kundenahan an korapsyon, ngan manawagan han dugang nga sweldo, pagbayad ha mga benepisyo ngan kadugangan nga tawuhan ha mga ospital han gubyrno. Gumios gihap an mga estudyante ha UP-Tacloban ngan University of Eastern Philippines ha Norther Samar.

Hadton Oktubre 31, utro nga nagmartsa an mga grupo ilarum han Bayan ha Mendiola ha Manila. Iginlansar liwat hiton nga adlaw han Concerned Artists of the Philippines an #StopKorap Halloween Party nga may tema nga "Ghost Projects: The Exorcism!" ha Quezon City. Nagkamayda gihap han Black Friday Protest ha Caloocan ngan Pasay City, San Pablo City ha Laguna, ngan ha Cagayan de Oro City.

Tango han pasismo

Ha atubangan han natikahiluag nga kangalas han katawhan, dirudiretso an pag-atentar han rehimen Marcos nga pugngan ngan tarhugon an kabatan-unan. Hadton Nob-



yembre 3, nag-anunsyo an Philippine National Police-Criminal Investigation and Detention Group (PNP-CIDG) nga nagsalawad ini han mga kaso ha 97 nga waray ngarani nga indibidwal kasumpay han protesta hadton Septyembre 21 nga nahingadto ha madarahug nga pagpupoy han mga pulis.

Dugang ha ira, upat nga lider-estudyante tikang ha University of the Philippines-Diliman, Polytechnic University of the Philippines ngan De La Salle-College of St. Benilde an ginpadad-an han PNP-CIDG han *subpoena* agud igpailarum ha imbestigasyon. Diniri an mga lider-kabatan-unan nga umatubang ha mga pulis. Usa nga protesta liwat an iginlansar nira hadton Oktubre 27 ha hedkwarters han PNP ha Quezon City agud suknaon an mga *subpoena*.

Labot hini, napulo ha mga ginaresto nga 270 nga indibidwal hadton Septyembre 21 an iginrekomenda han prosekutor ha Manila nga pormal nga umatubang ha kaso nga *tumult and other disturbances of public order*. Samtang, iginbasura an mga reklamo nga ilegal nga asembleya ngan *direct assault* nga iginlalawad ha mga ginaresto tungod ha kawaray hin sadang nga ebidensya.

AB

Korapsyon ngan pagkukwari ha Cebu, nagresulta ha trahedya

NAABOT NA HA 139 an nalista nga namatay ha Cebu hadton Nobyembre 7 bunga han pagrumpagas han ba-ha durot han waray wantas nga pagkukwari ha kabu-kiran han isla, nga ginpagrabe han hitaas nga bolyum han uran nga dara han Bagyo nga Tino. Pinakadamo an nahireport nga namatay ha Liloan ngan mga syu-dad ha Talisay, Mandaue ngan Cebu, mga lugar diin kinahanglan mayda nakatindog nga imprastraktura nga *flood control*, kalakip an mga proyekto nga gin-kontrata ha mga kompaniya han mga Discaya. Ikadu-ha an Cebu ha may pinakadamo nga proyekto nga *flood control* ha nasud nga nabalor han ₱26 kabilyon.

Panawagan han mga Cebuano an hustiysa ha mga ginlasurbo dara han kapalpakan han mga *flood control* nga proyekto, ngan baratonon ha mga korap nga lokal nga nasyunal nga upisyal han gubyerno.



Piket kontra taas-sukot ha tubig. Nagpiket an Bayan-Panay ha upisina han Metro Iloilo Water District ha Iloilo City hadton Oktubre 20 agud suknaon an nakata-laan nga umento han sukot ha tubig. Mag-uumento han sukot an Metro Pacific Iloilo Water hin 26% ngadto ₱25.2 kada *cubic meter* ha Nobyembre ngan magigin ₱28.67 kada *cubic meter* ha Marso 2026, tikang ha pre-sente nga ₱20 kada *cubic meter*.

NCIP ha Pampanga, ginkalampag han mga Ayta. Ki-nadto ha upisina han NCIP Regional Office ha San Fer-nando, Pampanga hadton Oktubre 23 an mga minoriya nga Ayta ngan iba pa nga mga sektor. Nagpahayag hira han pagtipa ha mga proyekto nga nanlulupot ha ira an-sestral nga tuna sugad han mga operasyon nga kwari, mina, mga *golf course* ngan *solar farm*. Antes an paggi-os, igintukod han mga Ayta an ira organisasyon nga Mansaway ngan an Pamilalamu, asosasyon han mga minoriya ngan singbahan.

Kabatan-unan nga Mindanaoan para ha Palestine. Naglansar han paggios an mga estudyante han Minda-nao State University-Iligan Institute of Technology ha Iligan City ngan University of Science and Technology of Southern Philippines ha Cagayan de Oro City hadton urhi nga semana han Oktubre komo pakig-usa ha ka-tawhan Palestino. Ginsukna nira an henosidyo han Zio-nista nga Israel ngan han imperyalista nga US kontra ha mga Palestino ha Gaza.

Pagtipa ha pribatisasyon ha merkado ha Baguio City. Gumios an mga residente han Baguio City hadton Oktubre 26 agud tipahan an pribatisasyon o gintawag nira nga "mallification" han SM Prime Holdings ngan lokal nga gubyerno ha pampubliko nga merkado ha syudad. Naglansar han magkalain-lain nga tipo han ak-tibidad an mga grupo komo panawagan para ha inklusi-bo ngan nakasentro ha komunidad nga pag-uswag ha syudad.



Pakigbisog han trabahador ha Wyeth Philippines. Utro nga nagprotesta an mga trabahador ha pangunguna han Wyeth Philippines Progressive Workers Union-DFA-KMU ha atubangan han planta han kompaniya ha Cabuyao City, Laguna hadton Oktubre 24. Ginkundena nira an padayon nga pagdiri han kapitalista nga batunon an panawagan nira nga makatadungan nga suhol ngan regularisasyon ha haros upat kabulan na nga nego-sasyon para ha *collective bargaining agreement* (CBA).

Suhol ngan katungod, panawagan nga irespeto ha Kowloon. Nagpiket an mga trabahador han Kowloon House West ha gawas han restawran ha West Avenue, Quezon City ha pangunguna han Kowloon House West Chapter han Glowhrain-KMU hadton Oktubre 24. Gin-kundena han unyon an gintawag hini nga butaray nga pagbalewaray han maneydsment ha katungod han mga trabahador ngan pagtalapas ha ira CBA. Sigon ha un-yon, pakyas an restawran nga igpatuman an mga pro-bisyon han CBA sugad han *across-the-board* nga umen-to ha suhol subay ha mando han *regional wage board* ngan tukma nga proseso ha mga kaso han pagdisiplina. Diri liwat ini nahatag han kaangayan nga benepisyoy ngan proteksyon.

2 nga unyon ha UA&P, nangangandam magwelga. Nagsubmiter han report han *strike vote* an University of Asia and the Pacific (UA&P) Union of Faculty Mem-bers ngan UA&P Union of Allied Employees ha Natio-nal Conciliation and Mediation Board (NCMB) hadton Oktubre 27. Baton ini han duha nga unyon ha pagdiri han administrasyon han unibersidad ha panawagan nga dugang nga sweldo, benepisyoy ngan maupay nga kamu-tangan ha trabaho. Upat kabulan na an pakikig-areglo han mga unyon ha administrasyon ha lebel han NCMB kundi nagpapabilin nga matig-a ngan bungol ini ha ira panawagan.

94th IB, gin-atake han BHB

NAGLANSAR HAN OPERASYON haras an Bagong Huk-bong Bayan (BHB)-South Central Negros (Romeo Nan-ta Command) kontra ha tropa han 94th IB ha Sityo Cantupa, Barangay Buenavista, Himamaylan City, Negros Occidental hadton gab-i han Oktubre 27. Diri mamenos ha duha an nasamaran ha mga berdugo nga sundalo.

Nagdadlagan an mga sundalo ngan pira kasegundo pa antes nakabulos han buto. Waray wantas nga nag-pauran han bala ha erya an 94th IB gamit an ira ma-singgan ngan nagpabuto han M203.

Samtang, nahireport nga sinurender ha BHB-Southwest Negros (Armando Sumayang Jr Command) an pira nga ahente nga intel han 15th IB ha bungto han Cauayan hadton Oktubre. Ginkarawat han yunit an pagsurender ha basaranan nga waray pa nahibang ngan utang nga dugo ha rebolusyunaryo nga kagiusan ngan katawhan an mga intel.

Ginpapakusog han Kaguma an ranggo han mga rebolusyunaryo nga magturutdo

Mapagdesisyon nga gin-uung-bawan han Katipunan ng mga Gurong Makabayan (Kaguma) an mga kaluyahan ngan kasaypanan hini ha naglabay nga mga tuig, ha inspirasyon han kagiusan pagtutul-id han rebolusyunaryo nga kagiusan. Pamatuod hini an paglansar han rebolusyunaryo nga grupo han mga magturutdo han ira Ika-upat nga Nasyunal nga Kongreso hadton Oktubre.

Nagtirok an diri mamenos ha 79 nga kaapi tikang ha mga tsapter han Kaguma tikang ha magkalain-lain nga rehiyon, akademiko nga institusyon ngan unibersidad ha sektor han edukasyon para ha kongreso. Nagkaurusa an mga delegado ha tema nga "Sulong rebolusyunaryo nga kagiusan magturutdo! Magtul-id! Magpahiluag! Makigbisog! Magdagug! Bug-os kusog nga ipasulong an demokratiko nga rebolusyon han katawhan nga may sosyalista nga perspektiba!"

Masobra duha kadekada na an nakalabay tikang han iglansar an urhi nga kongreso han grupo. An mga syahan hini nga kongreso iginhimo hadton 1985, 1987 ngan 2003. Naitukod an grupo hadton Marso 28, 1971.

"Utro nga ibangon an Kaguma, maisugon nga magpahiluag ngan magpakusog ha bug-os nga nasud. Pursigido nga ipasulong an mga komprehensibo nga buruhaton para ha rebolusyon," sigon ha Nasyunal nga Sekretaryat ha report hini ha pagtitikang han kongreso.

Ha katitirok, iginreport han sekretaryat an sumada han Kaguma ha kalugaringon nga organisasyon ha nakalabay nga duha kadekada. Landaw dinhi an mapainubsanon nga pagsuson ha kalugaringon ha pagbul-iw ha bataan nga prinsipyo han rebolusyunaryo nga organisasyon ngan ha mga pamaagi hini ha nakalabay nga mga tuig.

Napinal ngan napagkaurusahan han kongreso an mga importante nga dokumento han Kaguma kalakip an oryentasyon, bataan balaud



ngan tulo katuig nga tak-tikal nga plano hini. Ginbailayan ha kongreso an unom nga resolusyon nga maggigiya ha dirudiretso nga pag-abante han organisasyon.

Nag-eleher liwat an kongreso han bag-o nga Nasyunal nga Kongreso ngan Nasyunal nga Komite nga Tagapagpatuman nga matindog nga pamunuan han organisasyon ha bug-os nga nasud. Ginpili hi Guia Umili komo tagapangulo ngan tagapagyakan han Kaguma.

Ginkalipay han National Democratic Front of the Philippines ngan han Partido Komunista ng Pilipinas an desisyon ngan pagpupursige han Kaguma ha paglansar han Ika-upat nga Nasyunal nga Kongreso hini.

"Naglalaum kami nga hini nga kongreso makokonsolida niyo an iyo ranggo, makakapurot han mga leksyon tikang ha mga eksperyensya, ngan mas madig-on nga maabante ha pagpatuman ha mga buruhaton ha pagpakusog han rebolusyunaryo nga ranggo han mga magturutdo," pahayag ni Elian Dipasupil, pankabug-usan nga sekretaryo han NDFP.

Sigon kan Marco Valbuena, puno nga upisyal ha impormasyon han PKP, diri madidiwara nga makasaysayan an nahilansar nga kongreso, diri la tungod kay nahilansar ini ka-human an hilaba nga panahon, kundi tungod kay seguridad nga pag-abre ini han bag-o nga panahon han pagpasulong ha mas hitaas nga balitang han rebolusyunaryo nga kagiusan magturutdo.

Sering ni Valbuena, an Kaguma

nagseserbe nga kapawa para ha mga magturutdo

nga nahatag lamrag ha dalan nga kinahanglan nira hasugon para makab-ot an katuyuanan nira ngan han bug-os nga katawhan. "Ha iyo pagpupursige, gintagan niyo han inspirasyon an mga magturutdo agud mag-inaw lahos ha presente nga kakurian, ngan makig-usa ha pakigbisog han mas hiluag nga katawhan para hul-os nga bag-uhon an sistema pankatilingban," mensahe niya ha Kaguma.

Ha paghuman han kongreso, duruyog nga utro nga nagsumpa an mga kaapi ngan mga bag-o nga naeleher nga pamunuan nga ginsundan han panserra nga pamulong han tagapangulo. Ha iya mensahe, ginkilala ngan ginpasidunggan han tagapangulo nga hi Umili an mga martir han sektor ngan han katawhan. "Hira nga naghalad ngan naghatag han bug-os nga kinabuhi para ha rebolusyon. Pasidunggan naton an mga kasama naton nga aada ha kabaryuhan ngan nakatin han hitaas ng porma han pakigbisog," sering niya.

Nagbilin hin ayat ha mga delegado han kongreso hi Umili: "Hinaot padayon nga kumusog an sumpayan han aton rebolusyunaryo nga teorya ngan praktika; hinaot an mga dokumento ngan mga pag-aram diri magigin hunong nga kahibaruan nga nakabiaw la ha aton mga hunahuna kundi magin giya ha pagpapauswag han aton paggios; ngan an aton paggios naman maduso ngadto ha mas hitaas nga balitang an aton rebolusyunaryo nga teorya."

AB

PORK BARREL ni MARCOS

₱15.9 KABILYON

*confidential and intelligence
funds (2022-2025)*

₱2.1 KATRILYON

*unprogrammed allocations
(2023-2025); diin ₱214.4
kabilyon igin-alutaga ha 3,700
flood control projects, kadam-
an maanomaliya ngan ghost.*

₱1.79 kabilyon

pondo nga igin-alutaga ha *substandard* nga
flood control project ha **Bunawan River** ha
Davao City tikang 2016 tubtub 2024. May
mga parte ini nga diri human hasta yana.

Ginkuhaan: Kilab Multimedia

1 ha kada 5

nga Pilipino ha edad 10-64 **functionally illiterate**.
Akos nira magbasa ngan magsurat kundi diri ini
mahigamitan ha matag-adlaw nga kinabuhi

*Ginkuhaan: Philippine Statistics Authority/Functional
Literacy, Education and Mass Media Survey*



15 kamilyon

nga **Venezuelan** an
nagpalista tikang Agosto
para utro nga tukuron an
Bolivarian Militia ha
bug-os nga nasud.
Pagpapakita ini nga
"andam, aktibo ngan
armado" an pwera nga
milisya nga depensahan an
nasyunal nga teritoryo han
Venezuela atubangan han
panhadlok ngan hulga nga
pangatake han US.

188

namatay ngan 135 an nawawara, kadam-
an ha Visayas durot han grabe nga pag-
uran ngan pagbaha nga dara han **Bagyo
nga Tino**. Aada ha 127,827 nga pamilya
an napiritan mag-ebakwet tikang ha ira
mga komunidad.



3,000 ►

parupangisda ha Bais
City ngan Manjuyod
an nahibang an
pakabuhi tungod ha
pagkabuhos han
kemikal nga *ethanol*
tikang ha **URC Sugar
and Renewables
Group Distillery
Plant** hadton Oktubre
24; ginhilo han
kemikal an riko nga
katubigan ngan
karikuhan-ha-dagat
han Tañon Strait.



14 katuig

na an linabay tikang han
patayon han paramilitar
han AFP hi **Fr. Pops
Tentorio**, tag-undong
han katungod han mga
Lumad ngan
tagdepensa han
kalibungan, hadton
Oktubre 17, 2011.



An natikagrabe nga pasista nga panmuypoy han rehimen Trump ha katawhan han US

Manapulo kabulan pala tikang han utro nga lumingkod hi Donald Trump ha poder, naabot ha bag-o nga lebel han pintas an iya kontra-katawhan ngan kontra-demokratiko nga palisiya.

Ginsasagad ni Trump an tubtuban han iya poder komo presidente han US. Napostura hiya nga hadi ngan diktador nga ginhihimo anuman an iya karuyag hin waray baratunon. Butaray niya nga igindidirher an iya administrasyon ngadto ha pasista nga paghahadi ngan diktadura. Butaray liwat niya nga ginigigipit an mga kalibrihan ngan sibil nga katungod han katawhan ngan ginliligis an kalugaringon nga mga balaud, proseso ngan institusyon.

Ha pamostura nga diktador, gin-gagamit ni Trump an mga pwersa militar (US Marine ngan National Guard) agud paluhuron an mga *sanctuary state* o mga estado nga nagkikilala ha katungod han mga imigrante. Hadton Septyembre, iginpahayag ni Trump an iya plano nga gamiton an militar agud puypuyon an mga pag-ato ha iya mga palisiya. Sering niya, waray ginkaibhan an mga tawo nga natipa ha iya rehimen ha mga kaaway han US ha iba nga nasud.

Gintagan ni Trump an Immigration and Customs Enforcement (ICE) hin "kota" nga 3,000 nga pangaresto han mga imigrante kada adlaw ngan gintagan hin otorisasyon an paggamit han pinakamadarahug ngan brutal nga pamaagi. Target han pangastigo, panmusil, paglanat ngan deportasyon an hinoman nga nagsusukna kan Trump, an mga "nahitsura nga imigrante" ngan mga aktibista.

Inabot na ha 23 nga indibidwal an napatay samtang aada ha kusto-diya han ICE, kadam-an durot han paghikaw han atensyon medikal. Aada ha 515,000 nga indibidwal an napadeport ngan aada ha 1.6 kamilyon nga imigrante an pwersahay nga ginpalayas o naglugaring gumikan yana nga tuig. Haros 60,000 an iligal nga nakapriso ha mga pasilidad han ICE diin nahiaagum hira

han pangabuso, pagmaltrato ngan kawaray serbisyo medikal.

Hakog ha poder, pira kabeses na nga iginpahayag ni Trump an iya intensyon nga utro nga dumalagan komo presidente ha ikatulo nga termino ha anuman nga pamaagi, bisan kun talapas ini ha konstitusyon han US. Iginbutang niya ha poder an iya mga alyado ngan kalugaringon nga mga abugado, samtang ginkasuhan, ginlanat ngan gintanggal ha trabaho an ngatanan nga naato ngan diri nasugot ha iya kapritso. Pirit niya nga ginpapaluhod ha iya karuyagon an mga kompaniya han midya, husgado, mga ahensya han gubyrno, mga kritiko, ngan mga unibersidad.

Ginpapintas liwat ni Trump an langyaw nga panginginlabot han US. Pinaagi han pagsuplay han mga misayl ngan armas ha Zionista nga estado han Israel, aktibo nga nakikigkonsabuhay hi Trump ha henosidyo kontra ha mga Palestino. Ginsulsulan niya an pag-atake han Israel ha Iran hadton Hunyo ngan iginmando an paghulog han dagko nga bomba didto. Igindeklara niya an plano nga atakihon an Venezuela agud pwersahay nga patalsikon an kontra-imperyalista nga presidente nga hi Nicolas Maduro. Padayon an *proxy* nga pakikiggerra han US kontra ha Russia ha Ukraine. Mas natikahiluag an panginginlabot hini ha Taiwan ngan Pilipinas.

Butaray nga gin-gagamit ni Trump an iya pusisyon agud dugang nga makaghakin han karikuhan. Ginkasuhan niya hin "fake news" an usa nga kompaniya nga midya, para la kumarawat hin pira kamilyon nga dolyar nga "pakigtuhay." Hul-os nga kalipay niya nga ginkarawat an usa nga \$400-kamilyon nga *jumbo jet* tikang ha gubyrno han Qatar komo "donasyon" nga mahingangadto ha iya pananag-iya kahuman han iya termino. Hadton Oktubre, igin-in-

sister niya ha tawo niya ha Department of Justice nga kinahanglan hiya baydan han ahensya han balor nga \$230 kamilyon komo kumpensasyon tungod kunuhay ha pagtalapas hini ha iya katungod han imbestigahon hiya han gubyrno hadton 2023 ngan 2024.

Ha presente, nakapailarum ha "shutdown" o serrado an gubyrno han US tungod ha waray pagkasarabot han mga kongresista kasumpay ha badyet han estado para ha 2026. Waray labot an rehimen ha nahiaaguman nga pag-inantos han mga empleyado han gubyrno nga nagtatrabaho hin waray suhol, o ha tikaubos na nga ayuda nga pagkaon para ha mga pamilya nga nakarawat la hin minimum nga suhol. Lugod, nalilibang hiya ha pagtindog han 90,000 kametro kwadrado nga *ballroom (dancing hall)* ha White House nga nagbabalor hin \$300 kamilyon, nga plano niya nga ig-ngaran ha iya kalugaringon.

Nasasagad an kangalas han katawhan han US ha rehimen Trump. Bisan an mga hadto sinuporta ha iya nagpabati han kangalas ngan pagkadismaya ha iya panggubyrnuhan. Waray pa hiya makaabot hin usa katuig ha poder kundi karuyag na hiya patalsikon ha poder han mga Amerikano.

Natikakusog an guliat han katawhan Amerikano: Patalsikon ha trono hi Trump! Gatus-gatos nga protesta na an iginlansar ha magkalain-lain nga parte han US agud kundenahon an iya kontra-katawhan mga palisiya. Nagkaurusa an mga komunidad agud panalipdan an mga imigrante tikang ha madarahug nga paglanat han ICE.

Inabot ha pito kamilyon an tinambong ha protesta nga "No Kings" hadton Oktubre 18 agud igpakita an ira disgusto ha pasista ngan kontra-katawhan nga panggubyrnuhan ni Trump. Ini an pina-kadako nga paggios ha nasud yana nga tuig. Ini liwat an ikatulo nga

Sundan ha paypay 9

Kamutangan han mga Pilipino nga migrante, natikagrabe

Ha naglabay nga mga semana, susrunod an mga report han grabe kamakuri nga kamutangan han mga Pilipino nga migrante nga madarahug nga ginlalanat, gin-aabuso, gindedeport ngan ginhihikawan han hustisya ngan mga katungod. Ha paggrabe han pankalibutan nga krisis ha ekonomiya, nagigin target hira han reklamo nga pangagaw han trabaho, ginbaba-sol ha implasyon ngan paghitaas han tantos han krimen ha gin-kakamutangan nira nga mga nasud.

Ha Canada, Japan ngan Korea, mas naggrabe an paglanat ha mga imigrante durot han kontra-migrante nga patakaran ngan natikagrabe nga kultura han rasismo ngan *xenophobia* (pagdiri ha mga langyaw).

Ha Taiwan, inabot ha 169 an nahilista nga ihap han biktima han panlugos ha ranggo han mga migrante nga trabahador ha nasud hadton nakalabay nga tuig. Aada ha 22 ha mga biktima Pilipino. Mayoriya ha mga biktima nagtatrabaho ha pabrika ngan komo *domestic helper*.

Ha US, 143 nga Pilipino nga marino an igindeport tikang ha nakalabay nga tuig. Hadton Septyembre, ginkansela han embahada han US ha Pilipinas an aprubado na nga mga US *visa* han mga marino nga tigikan pala ha nasud. Sugad ha mga ginpadeport nga marino, gin-gamit han embahada nga hinungdan an akusasyon nga kaso nga *child pornography* bisan kun waray ebidensya o imbestigasyo nga iginhimo.

Ha Thailand, masobra usa kagatos nga Pilipino nga biktima han "scam-hub trafficking" an nakaabot na ha bawnderi han Myanmar ngan nanginginahanglan hin layon nga bulig ngan dagmit nga aksyon.

Ha Kuwait, hilaw nga hustisya an nakab-ot han pamilya ni Dafnie Nacalaban, usa nga *domestic helper* nga ginpatay han iya amo. Ginpatukan la hin 14 katuig nga pagkakapriso an nasinging nga amo nga himubo nga sentensya para ha iya krimen.

Ha The Netherlands, iginhikaw liwat an hustisya ha 11 nga Pilipino nga migrante nga trabahador ha desisyon han Public Prosecution Service nga igbasura an reklamo nira nga *human trafficking* kontra ha Saints and Stars Gym nga nakabase ha Amsterdam.

An makaluluoy nga kamutangan han mga migrante direkta nga bunga han *labor export policy* han reakyunaryo nga gub-yerno nga Pilipino. Gin-uundong hini nga mga palisiya an mig-rasyon han mga trabahador nga Pilipino imbes nga batunon an problema han kawaray trabaho, makaburuhi nga suhol ngan disente nga serbisyo sosyal.

AB

Tikang ha paypay 8

nasyunal nga protesta yana nga tuig.

Aktibo nga napartisipar an mga demokratiko nga organisasyon han mga Pilipino ha mga paggios ha US. Naglansar hira han mga kampanya ilarum han Tanggol Migrante Movement, agud igpanawagan an pagpapagawas, tagan proteksyon ngan serbisyo an mga ilegal nga iginpriso nga mga Pilipino nga migrante, ngan sukton an gubiyerno nga Marcos ha baratunon hini nga protehiran an mga Pilipino ha US.

Ha Nobyembre 8, ha syahan katuig han pagdaug ha elek-syon ni Trump, nakatalaan nga maglansar hin protesta an magkalain-lain nga tsapter han mga organisasyon ha US ha pangunguna han Bagong Alyansang Makabayan.

AB

North Caloocan, gin-aatake han 12th CMO ngan NTF-Elcac

Usa kabulan na nga ginsasamok han 12th Civil Military Operation (CMO) Battalion ngan NTF-Elcac an mga residente han North Caloocan. Wala-tuo an iginhimo hini nga *Red-tagging*, paniniktik ngan pan-gigipit labina ha mga membro han progresibo nga organisasyon ha mga barangay.

Syahan nga nadeploy an batalyon ha Barangay 181-182, Pangarap Village hadton Oktubre 3 ha tahub han Community Support Program. Plano han militar nga puypuyon an pag-ato han katawhan nga naatubang ha hulga han demolisyon tikang ha pamilya Araneta.

Nagtikang nga magkampo an 12th CMO ha pangunguna ni 2nd Lt. Julie San Jose ha likod han *covered court* han Barangay 175, Camarin hadton Oktubre 6, ha tahub han kamurayawan ngan kaayusan. Dinhi na nagpokus han operasyon an batalyon. Kataliwan han pira kaad-law ginlupgop han ira operasyon an Barangay 187-188 Tala.

Hadton Oktubre 28, ginsulod an upisina han Gabriela-Caloocan han nagpakilala nga mga pulis. Nagdeklara ini nga may dara nga mandamyento de aresto kundi waray nahipakita nga dokumento. Ha pareho nga adlaw, iginpatawag han militar ngan kapitan han barangay an mga membro han Gabriela-Matarik ha *barangay hall* diin gin-akusahan hira nga rekruter han rebolusyunaryo nga organisasyon.

Gin-gamit liwat han NTF-Elcac an asembleya han barangay hadton Oktubre 18 agud magpasamwak han sayop nga impormasyon ngan ig-*Red-tag* an mga organisasyon masa. Butaray an paniniktik han militar ha mga gios protesta kontra ha korapsyon han mga progresibo nga grupo, nga iginlansar ha Camarin Kiko Palengke ngan ha UCC Congressional Village hadton Oktubre 10 ngan 17.

Nababaraka an Defend Caloocan nga utro nga pupuguson han militar an mga membro han progresibo nga grupo ngan an mga residente nga "magbalik-loob" sugad han ginhimo han 12th CMO ha United Vendors Alliance hadton 2024.

An militarisasyon nga nahitatabo ha North Caloocan nakasubay ha balayan han National Action Plan for Unity, Peace and Development. Sigon ha programa nga Capacitating Urban Communities for Peace and Development nga ginpapangunahan han Department of the Interior and Local Government, iginpapailarum an mga komunidad ha kasyudaran nga mayda nakatukod nga patriyotiko nga organisasyon ha operasyon nga sarbeylans, pan-gigipit ngan panmuyopoy han PNP ngan AFP.

AB

Panginginlabot han NTF-Elcac ha mga unibersidad, ginpapakyas han mga estudyante

PUKAW NGAN MILITANTE nga ginpapakyas han mga kabatan-
nan ngan estudyante an gin-atentar nga panginginlabot han Na-
tional Task Force-Elcac ngan mga binaydan nga traydor ha rebo-
lusyunaryo nga kagiusan ha mga unibersidad ha tahub han mga
"porum" ngan "akademiko nga diskusyon."

Ha UP Mindanao, nag-walkout an mga lider-estudyante ha
kampus ha porum han TAGBO 2025 hadton Oktubre 26 tungod ha
paglusot ngan pagyayakan ni Arian Ramos, traydor ha rebolusyu-
naryo nga kagiusan ngan usa ha pinakatampalasan nga tagde-
pensa han NTF-Elcac ngan Armed Forces of the Philippines. Hi
Ramos, sugad han iya igkasi traydor, an nangunguna ha *Red-tag-*
ging han lehitimo nga mga organisasyon han estudyante ngan ira
mga lider. Nagdara pa hi Ramos hin "bodyguard" nga ahente pa-
niktik nga nagdurot hin grabe nga kabaraka ha mga estudyante.

Gindayaw han Council of Student Leaders han unibersidad an
ginhimo nga pag-walkout han mga estudyante. Ginsukna liwat ni-
ra an administrasyon han UP Mindanao nga nagtugot ha panhita-
bo nga sering nira diri usa nga "isolated" (nalalain) nga insidente.
Sering nira, espiho ini han mga "kaluyahan ha institusyon" nga
hadto na nira ginsukna. Masobra 30 nga organisasyon nga pan-
estudyante han UP Mindanao an nagpirma ha pahayag han CSL.

Ha UST, napaatras han kolektibo nga pagkundena han mga
estudyante an partisipasyon kunta han NTF-Elcac ha porum nga
"Preventing Terror Grooming: The Philippine Experience." Sigon
ha mga progresibo nga grupo ha kampus, an pag-imbita ha
ahensya pagtamas-tamas ha dungog han unibersidad ngan ha
mga Tomasino nga iginpapakigbisog an kamatuoran.

Hadton Nobyembre 5, naghimo hin protesta an mga estud-
yante ha kampus komo pagrehistro han pagsukna ha NTF-Elcac
ngan ha porum. Bisan kun napaatras an NTF-Elcac, nagserbe pa
gihapon nga bisita ngan tagapagyakan ha porum hadton Nob-
yembre 6 an tinaglawas han National Security Council ngan tray-
dor nga hi Arian Ramos. Nakigdebate ha ira ngan nanindugan
kontra *Red-tagging* an usa nga aktibista ha UST.

Isla han Leyte, ginlasurbo han militarisasyon han 802nd IBde

TIKANG ENERO TUBTUB Oktubre yana nga
tuig, diri mamenos ha 99 nga barangay
ngan 15 nga munisipalidad ha isla han Ley-
te an ginlasurbo han operasyon kombatan han
802nd IB. Kabakyang hini ha operasyon an
14th IB, 93rd IB, 8th CMO Battalion ngan
pulis.

Ha prubinsya han Leyte, aada ha 10
nga bungto an ginlupgop han operasyon
kombatan, kalakip an Baybay City, nga hadton
Pebrero iginkategoriya nga Stable Internal
Peace and Security Condition (SIPSC) agud
pagawason nga waray na pwersa an hukbo
han katawhan ha lugar. Hadton Sept-
yembre, iginpailarum ha hamlet an Ba-
rangay Caraye ha Javier, ngan barangay
Igang ngan Hilapnitan ha Baybay City.

Ha Southern Leyte, lima nga bungto an
militarisado, kalakip an Saint Bernard nga
iginkategoriya liwat nga SIPSC hadton
Marso.

Sigon ha mga residente, kada nakada
ha baryo an militar dirudiretso an panhad-
lok hini. Pwersahay hira nga temprano nga
ginpapauli tikang ha ira mga umhanan. Gin-
tarhug hira nga aarestuhon ngan piprisu-
hon kun mahatag hin bulig ha hukbo. Gin-
pasurender liwat han militar an mga pusil
nga gin-gagamit han mga residente ha pa-
nganop.

Usa ha pinakaurhi nga krimen han mili-
tar ha isla an pagkadop ha parag-uma nga
hi "Loloy" nga taga-barangay Masuganao,
Mahaplag, Leyte. Gin-akusahan hiya nga
membro han Bagong Hukbong Bayan.

Panalapas ha tawhanon nga katungod ha Panay ngan Negros, nagpapadayon

Padayon nga gintatarget han militar ngan pulis an mga parag-uma ha isla
han Panay ngan Negros ha naglabay nga mga semana agud hadlukon an
mga komunidad ngan magsabrag hin terorismo.

Ha Negros Occidental, ginpatay
han militar an babaye nga parag-uma
nga hi Joan Escuadro hadton
Nobyembre 3 han gab-i. Ginsulod
han mga ahente militar an iya balay
ngan duok hiya nga ginpusil.

Ha Bago City, padayon an pan-
gigipit han pulis han Negros Occi-
dental District Jail-Male Dormitory
ha mga priso pulitikal ngan lider nga
inato ha pangabuso han napatalsik
kundi nakabalik ha poder nga hi
warden Maj. Crisysrel Awe. Arbit-
raryo nga ginbartolina hi Lorenzo

Perolino tikang Oktubre 26 han
kulop.

Ha Iloilo City, gin-aresto han
mga pulis an 67 anyos nga hi "Ma-
yok" ha Barangay Buntatala, Jaro
hadton Nobyembre 3. Ginsalawdan
hiya hin luun-luon nga kaso nga kri-
minal ngan gin-aakusahan nga hita-
as nga upisyal han rebolusyunaryo
nga kagiusan. Mayda hiya patong ha
ulo nga ₱2.55 kamilyon.

Samtang, gin-aresto han mga
pulis ngan militar an organisador
han parag-uma ngan nasyunal nga

minoriya nga hi Marlene Espiritu
samtang nabiyahe ha Mabalacat
City, Pampanga hadton Nobyembre
1. Gin-akusahan hiya nga hitaas nga
upisyal han BHB ha Central Luzon
ngan ginsalawdan hin lima nga kaso
nga kriminal.

Ha Davao City, ginpatukan hin
30 kaadlaw nga suspensyon han
Ombudsman hadton Oktubre 20 an
kapitan han Barangay Bucana 76-A
nga hi Robert Olanolan tungod ha
iya pag-ato ha demolisyon ha Ka-
bacan ngan Times Beach tikang pa
Enero 2024. Naatubang hi Olanolan
hin reklamo nga *grave abuse* nga
iginsalawad han DMCI nga may pla-
no magtukod hin negosyo ha lugar. **AB**